

文山先生全集

文山先生全集卷之八

文集

啓

通丁侍郎應奎

號璜溪

誤節讞湘馳驅上日摠衣過洛咫尺中台拜下有期恭先
告至恭惟某官黃河泰山之望咸池大濩之音學問單傳
安定公之蘊奧文章獨步歐陽子之聲名空萬馬以無前
領衆星而直上慷慨玉廬之給札聯翩璧府之彩纓一麾
江海以翱翔載駕風雲而磅礴翠帷麟觀螭陛鸞臺天子
穆穆以親賢海內顒顒而望賜方千仞翔而覽下乃六月
息以圖南矧如聖哲馳驚之秋正切廊廟論思之益胡不

起金魚而垂帶而乃新瑤象以爲車弭節愈窮履星采近
賈生見宣室亟紓半夜之思安石起東山大衍蒼生之福
某相望千里一間十年綠簑風雨之中菊餐有味舊綉波
濤之地蕉夢何心詎期漢節之來喚醒楚騷之讀黃緣通
德親切依仁瀟湘逢故人尚軫蓬蒿之舊霖雨思賢佐佇
看芝鳳之新傾耳一言拜手三肅

通楊提刑允恭

號高峯

誤節讞湘載驅上日樞衣過洛伊邇下風望履有期擘牋
告至欽惟某官溟南健翮斗北修名玉尺冰莖洒落絕塵
之韻瑤琴錦瑟和平瑞世之音自炊起而霆奔每徐行而

山立提振春陵之風月縱橫周序之鼓鍾日暖旌旗一麾
玉帳春明霄漢三道綉衣驅馳靡憚於賢勞出入有關於
民命方千仞翔而覽下乃六月息以晷南矧今聖哲馳驚
之秋正切英雄經濟之略江濤如許泉石謂何召賈誼於
長沙上心久渴見夷吾於江左天下何憂某飲菊悠然夢
蕉儻爾起家乘傳念舊綉之波濤畏道回車想綠葉之風
雨幸近十洲之島冀沾九里之河滕壤舊廬曾識平反之
譜周原新轡願承鞭辟之方拜下非遙由中莫既

回李安撫肯齋

叨臬湘南余征上日樞衣洛下伊邇中台亟裁書而叙心

將考德而問業恭惟某官名門人傑昭代吏師醴泉芝草
麒麟天生瑞質高山深林龍虎代出魁人見謂西珍蔚爲
南望自覽德翔千仞而下即回瀾障百川之東粉墻紫界
之踰躔玉檻丹梯之凌厲連麾江海風馳五袴之聲疊節
荆吳星度六絲之影以天下而自任何王事之獨勞追授
鉞於千畿乃進書於九扈俄動平地神仙之想來尋徃時
鍾鼓之盟湘水春深未許放情於黃老虞廷日求行看翔
舞於夔龍某飲菊悠然夢蕉儻爾起家乘傳念舊綉之波
濤畏道回車想綠簑之風雨幸近十洲之島冀沾九里之
河滕壤舊屢曾識平反之譜周原新轡願承鞭辟之方拜

下非遙由中莫既

回前人賀遷秩

影縻下隰奚補毫釐步進貞階忽饒分寸未謝玉淵之潤
先塵金薤之華自笑竿魚爲官何拓落也尚隨書鶴振德
而輔翼之未悉刊酌餘尚嗣布

送前人冬

灰管移新律暖轉蕙蘭鍾鼓衆清時春生花竹隔幔綈之
醲郁阻履襪之從容薄注鄂清式歌魯瑞俯慚雲繡又添
愛日之紋諭聽雷鼇趣侍含光之宴微芹馳瀆采菲知榮

賀前人冬

黃鍾噓暖繡線紀長錦堂增履襪之春綠野換荔芸之色
某謾馳今雨阻造下風諭睇翠蓬莫遂前茅之拜第瞻鶴
鰾早催元會之朝

餽前人歲

朱泥貼歲驚殘爆竹之寒綠野回春喚起屠蘇之曉欲贊
喧馬散鴉之集曾微橫鯉卧兔之供柏葉浮香諭想午橋
之宴梅花轉暖即迎卯詔之來輶瀆包羞麾留爲龍

賀前人正

攝提貞孟瓠春回甲胄祝融接天柱雲度午橋元氣與游
壽祺來介某官泰內君子西方美人樂鍾鼓於園林聲和

綠淨拜衣冠於閭闔光近清都表新渥於鶴書催窮班於
輦禁某迹縻俗駕心遶賀星遙指於軫中拳拳公壽雪立
殘於門外耿耿于懷

送前人元宵

火樹銀花簇朱陵之明月羅幃綉幙開綠野之春風莫陪
鍾鼓之勝遊敬效豆籩之攝飲醉長沙行湘水忍賦岸花
遶建章立通明佇依雲朶區區輶瀆眈眈麾留

賀前人納子婦

歡聲噪鵲喜氣乘龙日耀屏金春生堂錦伏惟歡抃某求
塵賀履敢後慶箋猥此將芹菲然采若倘蒙鑒茹無任欣

榮

送前人別會

楚節易麾有味林鳥之哺湘花舞席隴瞻湖鴈之飛感水
薤之風規持金蕉而兩別日暮碧雲合耿河漢之相忘月
明今宵多勞江湖之遠夢薄言折寄微惠麾留

謝章簾書鑑

綿田負耒投分一丘楚澤乘軺皈枕兩地公造化吹噓之
賜廣詳明欽恤之仁昉履南維輒箋西筦伏念某遭逢雖
早零落亦多一壑白雲對哺鳥而俯仰十年流水忘夢鹿
之去來不啻元日之會同猶記壯年之奔走我牛我車我

輦方墮影於湘波維駒維駟胡強頗於衡麓未許賦
東方之粟乃趣洩南冠之囚尊叱馭陽回車展轉於君親
之際皋明刑契敷教劑量於政化之間吏民甫接於咨詢
風俗重爲之感激龍蛇行而赤子瘳羔羊泯而素絲傷非
扶內地之本根曷壯重湖之保障曹劌之戰長勺或云察
魯獄之功孔明之駐臨蒸正在破荊賊之後恍聞風而興
起凜受命之艱難茲蓋恭遇某官德業兩朝人物三代頌
慶曆之聖德政府經綸用淳熙之真儒中天黼黻誕篤緇
衣之造齊調金鼎之和遂沐匿瑕亦叨將指某敢不靈承
清問惠迪嘉師奉使登車敢自詭范滂之操爲親拜表尚

曲全李密之私激切未央敷榮祇淺

先生前除湖南漕即報罷復除本路憲道體堂謹書

謝高尚書斯得

負耒耕綿方省愆於私室乘輶使楚忽拜命於公朝昉履
朱維敬箋丹屏伏念某

同前

茲蓋恭遇某官拱璧元圭泰

山喬嶷迓交殿之勸講總是經綸古灵臺之薦人不遺氣
類遂令起廢復忝司平某敢不迪惠嘉師靈承清問鞭辟
虺隤之陳迹濯磨執掌之新功自與心謀敢比范滂之攬
轡未以罪去尚容李密之陳情歸倚方長敷榮祇淺

謝陳尚書宜中

耕綿負耒方私室之省愆使楚乘輶忽公朝之錫命既履
朱維而陳臬亟瞻紫橐以修辭伏念某學極支離性惟駘
骯宿昌黎之南斗自嘆我辰事元亮之西疇每懷前路撫
陳編而慷慨恍初服之流離題柱而乘駟車不量已力叱
馭而馳九坂徒負壯心山川尚有於鬼神草木自全於霜
露迹已陳於芻狗影屢落於杯珌一壑白雲十年流水當
元會彰綸於日月乃一朝移綉於波濤血指創深貽羞巧
匠折肱痛定莫詭良醫請東方之粟以閔俞爲南冠之囚
而趣載周爰伊始汔濟奈何起觀今日之重湖正抵北風
之一面曹劌之戰長勺或云察魯獄之功孔明之駐臨蒸

正在破荆賊之後歛聞風而興起凜受命於艱難茲蓋恭
遇某官大呂黃鍾元圭拱璧天章閣之論事行展經綸古
靈臺之薦賢不遺氣類遂令起廢復忝司平某敢不激厲
新知濯磨旧玷沐浴蓬萊之風露昭蘇蘅芷之江山皇帝
清問何擇非人願言奉教王事靡盬不遑將母儻遂陳情
歸倚意長敦宣喙短

謝陳正言堅

省愆私室方負耒以耕綿拜命公朝忽乘輅而使楚初咨
詢而咨度終受察以受容踰跂拾遺敬箋主進某名浮實
淺意廣才疎早歲飛騰真有終軍之銳中年閱歷始知元

亮之非頃飯牛吉水之陽有秣馬湘江之旨此運使大躰
既無士遜之良去監司不才聊見希文之志進退用舍固
各有命栽培傾覆亦因其材此真生我之孟孫安得酖人
之叔子歲年忽忽空懷躍冶之羞風雨悠悠久斷問鈞之
夢不謂一寒之零落未爲諸老之棄捐取彼蒼葭謂粗嘗
於霜露憐其舊綉使復出於波濤血指創深見嗤巧匠折
肱痛定敢詭良醫方祈偃息於支離俄責驅馳於跛蹇慨
念重湖之今日浸憐一面之北風孔明之駐臨蒸正在破
荆賊之後曹劇之戟長勺或云察魯獄之功凜受任於艱
難恍聞風而興起孰主張是遂躋登茲茲蓋伏遇某官寒

露清冰泰山北斗雖剛不吐柔不茹卓然論事之風然過
者化存者神偉甚容人之度遂使山林之深密復叨原隍
之光華某敢不祇若平反對揚欽恤鞭辟地隲之陳迹濯
磨鞅掌之新功元龍百尺樓知將展下床之拜王尊九折
坂其敢忌叱馭之規飯倚方長敷茶祇淺

謝陳侍郎存

省愆私室方負耒以耕綿拜命公朝忽乘輅而使楚初咨
詢而咨度終受察以受容稽首席間通忝閣下伏念某名
浮實淺意廣才疎生平事可對人粗有聞於涑水仕太早
不及學或見笑於垂崖捫心每念於息肩回首不堪於鑪

錯司馬橋乘駟豈應聞命以疾驅管城子免冠正當爲法
而受惡然而兩停漢傳再黜周行皆緣一日之瑕疵自取
十年之坎坷悠悠白日空懷毀瓦之思落落青山久斷問
釣之夢不謂元日闕門之始猶在皇華遣使之中追天上
之雲龍望不到此詠人間之蕉鹿意若安之血指創深見
嗤巧匠折肱痛定敢詭良醫方祈偃息於支離俄責驅馳
於跋躐慨念重湖之今日浸隣一固之北風孔明之駐臨
蒸正在破荆賊之後曹劌之戰長勺或云察魯獄之功凜
受命於艱難恍聞風而興起孰主張是遂濟登茲茲蓋恭
遇某官拱璧元圭泰山喬嶽逕英殿之勸講總是經綸古

靈臺之薦賢不遺氣類遂令起廢復忝司平其敢不激厲
新知濯磨舊玷沐浴蓬萊之風露昭蘇蘅芷之江山皇帝
清問何擇非人碩言奉教王事靡盬不遑將母倘遂陳情
歸倚意長敷宣喙短

賀曹尚書孝慶

兼給事中

選高春伯光映夕郎創履摩雲煥清朝之文物簪裾照日
侈丹地之恩輝鼓舞風雷動搖鴛鴦恭惟某官名高二陸
才備百參風雲上下之交搗呵龍虎天日清明之瑞鞭駕
鳳凰春行霄漢之三麾星煥江湖之四節蘭臺壁水安定
龜山彤管青蒲歐陽司馬出袖磨霜之鉞浩吟捲雨之簾